

# STACIONAMIENTO DI TRAILERS LO SER FIHA A BASE DI SORTEO

**ORANJESTAD (APA)--** Realidad di Carnaval e aña 'ki ta pa esnan cu tin trailer cu si nan participa na e loting cu tin y si suerte toca nan, nan por haya un of te tres parcela riba e ruta di Vondellaan y L.G. Smith

Blvd. Un situacion lamentable, ya cu envez di fomenta mas participacion na nos carnaval, awe nos ta haya ta dedica atencion na mirones.

Ayera mainta na oficina di gobierno Noord a tuma lugar un conferencia di prensa unda miembronan di comision cu a traha riba asunto di ruta di Carnaval a duna tur informacion riba e cambio di procedura pa haya un pida terreno pa stationa trailers.

Dudu Adonis di Domeinbeheer a splica na placa chikito con e procedura pa un persona por haya un permiso ta bai. Ta bai duna dos dia di anuncio pa pueblo sa adelanta ki dia nan por acudi na Domeinbeheer pa haci peticion.

E persona interesa mester acudi na Domeinbeheer entre dia 10 y 16 di Januari unda e ta haci e peticion y paga 4

florin pa e stampia cu ta bai riba e peticion. Ta stipula cu cada persona por haci solamente un peticion identificando su mes debidamente.

Peticion cu ser yena pa e persona ta ser deposita den un tombola cu ta seya pa notario. Diarazon 16 di Januari e atardi aki tur peticion lo ser hiba Tele-Aruba unda cu lo pasa e peticionnan pa tombola di Tele-Aruba y anochi pa exactamente 9.45'or e sorteo lo ser transmiti vivo y directo pa henter pueblo.

Y dia 17 y 18 di Januari tur e nombernan di esnan afortuna di e loting lo ser publica y e ora y dia cu nan lo mester presenta na Domeinbeheer pa escohe un of mas parcela segun nan deseo. Domeinbeheer lo trata tur e permisionan aki dia 21 pa 25 di Januari. Y pa dia 26 di Januari, por cuminsa pone e trailernan.

Durante e sorteo lo saca e nombernan di e personan y den e secuencia cu nan sali e persona por bai Domeinbeheer pa paga nan peticion. ta pesey cu na momento cu saca e nombernan ta tene cuenta tambe cu e cantidad di parcela cu e persona a pidi y cu tin disponibel riba e ruta. Tambe ta asina cu lo saca 25 nomber extra cu lo ta riba e wachtlijst.